

Broj: 01-02/2-1048/25 SK/JKB
Sarajevo, 24.04.2025. godine

**BOSNA I HERCEGOVINA
FEDERACIJA BOSNE I HERCEGOVINE
PARLAMENT FEDERACIJE
PREDSTAVNIČKI DOM**
n/r gđin Dragan Mioković, predsjedavajući
n/r gđa Begajeta Čaušević, poslanik



**BOSNA I HERCEGOVINA
FEDERACIJA BOSNE I HERCEGOVINE
VLADA FEDERACIJE BOSNE I HERCEGOVINE**
n/r gđa Edita Kalajdžić, sekretar

Predmet: Odgovor na poslaničko pitanje, **dostavlja se-**

Veza: Akt predsjedavajućeg Predstavničkog doma Parlamenta Federacije Bosne i Hercegovine, broj: 05/1-02-186/25 od 03.04.2025. godine i akt sekretara Vlade Federacije Bosne i Hercegovine, broj: 03-04-709-31/2025 od 09.04.2025. godine

Poštovani,

Aktima broj i datum veze, Federalno ministarstvo rada i socijalne politike zaprimilo je poslanička pitanja postavljena od strane Begajete Čaušević, poslanika u Predstavničkom domu Parlamenta Federacije Bosne i Hercegovine, na 19. redovnoj sjednici Predstavničkog doma Parlamenta Federacije Bosne i Hercegovine, održanoj 02.04.2025. godine, a koja glase:

- “ 1. Da li su učinjene analize o učinkovitosti/šteti usvojenih izmjena o minimalnoj plati i neradnoj nedjelji na privredni sistem FBiH?
2. Koliki je broj zaposlenih osoba prema podacima Federalnog zavoda za zapošljavanje zaključno sa 31.03.2025. godine u usporedbi sa podacima iz istog perioda (31.03.2024.) te sa 31.12.2024. godine? Molim da se navedeni podaci dostave i za kantonalne zavode za zapošljavanje.
3. Postoji li komparativna procjena koja nam govori kakav učinak ima zabrana rada nedjeljom u FBiH? “

S tim u vezi, sa aspekta nadležnosti Federalnog ministarstva rada i socijalne politike, dostavljamo sljedeći odgovor:

U vezi prvog pitanja, kojim je zatražen odgovor da li su učinjene analize o učinkovitosti/šteti usvojenih izmjena o minimalnoj plati i neradnoj nedjelji na privredni sistem Federacije Bosne i Hercegovine, informišemo Vas da smo, sa aspekta nadležnosti ovog Ministarstva, te s obzirom da je Vlada Federacije Bosne i Hercegovine 30.12.2024. godine donijela Odluku o iznosu najniže plaće za 2025.

godinu ("Službene novine Federacije BiH", broj: 104/24), a imajući u vidu da primjena iste može uticati na tržište rada, u cilju kontinuiranog praćenja stanja na tržištu rada u Federaciji Bosne i Hercegovine, zatražili od Federalnog zavoda za zapošljavanje i kantonalnih službi za zapošljavanje dostavljanje objedinjenih podataka o broju novoprijavljenih nezaposlenih osoba koje traže posao, broju osoba brisanih sa evidencije i broju zahtjeva za ostvarivanje novčane naknade po osnovu nezaposlenosti, koji se vode u kantonalnim službama za zapošljavanje.

U skladu s navedenim, a na osnovu analiza o kretanju navedenih statističkih podataka za prva tri mjeseca u 2025. godini, sa uporedbom na kretanje istih u januaru 2024. godini konstatovano je da u Federaciji Bosne i Hercegovine nisu evidentirane značajne promjene u kretanju na tržištu rada, osim u Kantonu Sarajevo, gdje je na osnovu podataka dostavljenih od strane Službe za zapošljavanje Kantona Sarajevo za period 01.03. - 31.03.2025. godine u odnosu na januar 2024. godine evidentiran nešto veći broj prijavljenih na evidenciju, broj objavljenih sa evidencije i broj zahtjeva za ostvarivanje novčane naknade po osnovu nezaposlenosti.

Pored navedenog, za eventualno sveobuhvatniju informaciju o efektima učinkovitosti, odnosno šteti usvojene Odluke o iznosu najniže plaće na privredni sistem Federacije BiH, potrebno je obratiti se Federalnom ministarstvu finansija, odnosno nadležnoj poreskoj upravi u Federaciji Bosne i Hercegovine.

U vezi postavljenog poslaničkog pitanja, kojim je zatražena informacija o broju zaposlenih osoba prema podacima Federalnog zavoda za zapošljavanje zaključno sa 31.03.2025. godine u usporedbi sa podacima iz istog perioda (31.03.2024.) te sa 31.12.2024. godine, informišemo Vas da je prema posljednjim zvaničnim podacima objavljenim od strane Federalnog zavoda za zapošljavanje, zaključno sa 31.01.2025. godine u Federaciji Bosne i Hercegovine registrovana 547.291 zaposlena osoba. Broj zaposlenih u januaru 2025. godine u odnosu na januar 2024. godine, kada je bilo registrovano 542.116 zaposlenih osoba, veći je za 5.175 osoba, ili 0,95%.

Pored toga, u vezi poslaničkog pitanja, da li postoji komparativna procjena koja nam govori kakav učinak ima zabrana rada nedjeljom u Federaciji Bosne i Hercegovine, napominjemo da ne raspolažemo informacijom ili eventualnom procjenom u vezi navedenog, s obzirom da se isto ne odnosi na nadležnost Federalnog ministarstva rada i socijalne politike, međutim za detaljnije informacije u vezi navedenog možete se obratiti Federalnom ministarstvu trgovine koje je nadležno za primjenu Zakona o unutrašnjoj trgovini ("Službene novine Federacije BiH", broj: 87/24), kojim je, između ostalog, propisano radno vrijeme u djelatnosti trgovine.

S poštovanjem,

Dostavljeno:

- Naslovu
- a/a

